

LIGJ
Nr.10 430, datë 9.6.2011

PËR KRIJIMIN E SHOQËRIVE “HEC ULËZ – SHKOPET”, SHA, “HEC TIRANË, LANABREGAS”, SHA DHE “HEC BISTRICA 1 DHE BISTRICA 2 SHA” DHE PËRCAKTIMIN E FORMËS DHE TË STRUKTURËS SË FORMULËS SË PRIVATIZIMIT TË SHOQËRIVE “HEC ULËZ – SHKOPET”, SHA DHE “HEC BISTRICA 1 DHE BISTRICA 2” SHA

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Neni 1

1. Ngarkohet shoqëria KESH, sh.a. të bëjë ristrukturimin e saj, për efekt privatizimi, duke shkëputur, si pjesë të kapitalit të saj, njësitë e mëposhtme:

- Hidrocentralin e Ulëzës;
- Hidrocentralin e Shkopetit;
- Hidrocentralin e Tiranës (Lanabregas);
- Hidrocentralin Bistrica 1;
- Hidrocentralin Bistrica 2.

2. Këto njësi do të organizohen në tri shoqëri anonime si më poshtë:

Shoqëria “HEC Ulëz - Shkopet”, sh.a., shoqëria “HEC Lanabregas”, sh.a., shoqëria “HEC Bistrica 1 dhe Bistrica 2”, sh.a., me objekt veprimtarie prodhimin e energjisë elektrike.

Të tria shoqëritë e mësipërme do të jenë me kapital 100 për qind shtetëror, me aksionar të vetëm Ministrinë e Ekonomisë, Tregtisë dhe Energjetikës.

3. Shoqëria KESH, sh. a. të bëjë ndarjen e aseteve të trupëzuara dhe të çdo aset tjetër, që është pjesë e vlerës së kapitalit të këtyre shoqërive, si dhe sistemimin e llogarive financiare për shoqëritë e krijuara, në përputhje me bilancin e datës 31.12.2010.

Neni 2

Shoqëritë “HEC Ulëz - Shkopet”, sh.a. dhe “HEC Bistrica 1 dhe Bistrica 2”, sh.a. do t'i nënshtrohen procedurës së privatizimit.

Në këtë procedurë privatizimi nuk përfshihen basenet ujore të këtyre hidrocentraleve. Këto basene mbeten pronë publike e shtetit dhe e drejta e përdorimit të ujit dhe e rezervave ujore të këtyre hidrocentraleve rregullohen sipas ligjit nr. 8093, datë 21.3.1996 “Për rezervat ujore”, të ndryshuar.

Neni 3

Mënyra e privatizimit të këtyre shoqërive do të jetë me anën e transferimit tek të tretët të së drejtës së pronësisë së aksioneve ose nëpërmjet transferimit të të drejtave të përdorimit e të zhvillimit të këtyre njësive me kontratë koncesioni, sipas përcaktimeve të legjislacionit në fuqi.

Neni 4

Forma e privatizimit të këtyre njësive do të bëhet bazuar në rekomandimet e vlerësuesit të njohur ndërkombëtarisht, i cili do të kontraktohet si pjesë e kontratës së asistencës ndërkombëtare për

procedurat e privatizimit.

Neni 5

Struktura e formulës së privatizimit të aksioneve të kapitalit të këtyre shoqërive, në rastin e transferimit të së drejtës së pronësisë, të jetë:

100 për qind e aksioneve të kapitalit u ofrohen investitorëve strategjikë, nëpërmjet shitjes me tender të hapur ndërkombëtar.

Neni 6

Mënyra e trajtimit të punonjësve, që dalin të papunë nga procesi i ristrukturimit, në kuadër të privatizimit të këtyre shoqërive, si dhe burimet financiare të nevojshme për kompensimin e tyre përcaktohen me vendim të Këshillit të Ministrave.

Neni 7

Mënyra e përdorimit të të ardhurave, që do të përfitohen nga privatizimi i këtyre shoqërive, përcaktohet me vendim të Këshillit të Ministrave.

Neni 8

Ngarkohet Ministria e Ekonomisë, Tregtisë dhe Energjetikës për kryerjen e procedurës së përzgjedhjes së shoqërisë konsulente ndërkombëtare, si dhe të procedurës së privatizimit me asistencën e shoqërisë së përzgjedhur.

Neni 9

Ngarkohet Këshilli i Ministrave të nxjerrë aktet e nevojshme nënligjore në zbatim të neneve 6 dhe 7 të këtij ligji.

Neni 10

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr.7032, datë 29.6.2011 të Presidentit të Republikës së Shqipërisë,
Bamir Topi**